

LIBRARY
OF THE
UNIVERSITY
OF ILLINOIS
Emblems
x170
C28v


**Rare Book & Special
Collections Library**



Holes Copy

701
EV

175⁰⁰



Digitized by the Internet Archive
in 2009 with funding from
University of Illinois Urbana-Champaign

<http://www.archive.org/details/virtutescardinal00cate>



ANTVERPIÆ, EX OFFICINA PLANTINIANA. M. DC. XLV.

PRÆNOBILI AC GENEROSO

x170

C250

DOMINO

D. FRANCISCO
DE KINSCHOT,

Toparchæ de Kinschot, Riuiere, Iette &
Ganshorn, Catholicæ Maiestati in suprema
Ærarij ac Dominiorum Regionum per
Belgium Curiâ à Consiliis, &c. recens inter
Equites Ordinis Militaris S. IACOBI
solemniter inaugurato.



NOVI honoris auspiciis venio
gratulatum. Nam præter recentem
illam inter supremos Ærarij Regij
Consiliarios (etiam *Commis* voce vulgari)
dignitatem, tam nobili gloriosâque
Cruce, qualis ea est quæ à sancto IACOBO
nomen habet, dignum Te, Generose
Domine, Catholica Maiestas iudicauit ; cuius

nomine auctoritateque Excellentissimus Princeps Marchio de Caracena, Comes de Pinto, eidem Maieitati à Cubiculis, summus in hisce partibus Ductor Equestrium copiarum, & ipse Eques Ordinis S. IACOBI, in amplissimo confessu Marchionum, Comitum, Baronum aliorumque Equitum Crucis istius, Te militari illâ dignitate recens inauguravit. Et iam antè per alios munerum publicorum gradus viam tibi munieras. Parentem filius sequeris passibus non imparibus, indole non degeneri. Ille, vti ob fidem integritatemque iam per annos vigintiquinque supremi Ærarij Regij Thesaurarius fuit, ita ob negotiorum experientiam, rerum cognoscendarum facilitatem, iudicandarum maturitatem, agendarum dexteritatem, ob merita denique non vulgaria ab eadem illâ Maiestate in summum illud *Concilium Status* fuit adlectus. Qui honos vti in Repub. amplissimus est, ita sanè paucorum est: omnes annulo possent inscribi. Ad Te verò quod attinet; pergis quo cœpisti pede puer atque adolescens, quando in litterarum Palæstrâ quoties ad vltiorem scholam, toties quasi ex æde Virtutis ad noui Honoris templum

vide-

videbare conscendere. Testis oculatus refero;
cùm Bruxellæ, Humaniorum studiorum Lycæo
Præfectus, per sex annos morum tuorum indu-
striæque spectator interfuerim; vnde iam maior
quoque mihi causa atque necessitas hisce tuis
successibus amicè gratulandi. Ceterùm, par de-
inde tua & amplior in Philosophiæ & Iuris vtriuf-
que decursu gloria. Noueras siquidem veram
animi nobilitatem, post Virtutum decus, esse
scientiam. Neque studia tantùm tua plena fuère
commendationis, sed & itinera: in quibus tamen
multi, id ætatis præsertim, quantum oculis con-
spiciunt, tantum cæcutiunt animis; & dum pe-
dibus rectà iter intendunt, moribus longè exor-
bitant. Tantum valet in deteriorem partem na-
tionum contagio, atq; insolescens per absentiam
parentum libertas. Et nullibi tam liquidè ferax
virtutum solum est, cui non suum quoq; viticrum
lolium sit. Ita in Italiam profectus es, ita Romæ
versatus, vt nihil inde nisi verè Romanum, id est
cum laude virtuteque coniunctum, reportaris.
Quid dicam, quibus ducibus id omne confece-
ris? imò quibus & modò ad sublimiora con-
scenderis? vectum Te dixero *Quadrigâ Virtutum*

earum, quarum hîc speciem quamdam exhibeo. Quaternæ sunt, Cardinales sunt: in quibus omnis honesti rectique cardo voluitur. Agnoscisne eas iam pridem Tibi plusquam in imagine notissimas? Cùm Gymnasium litterarium (de quo iam antè) earum tabulis emblematicis, amplis atque egregiè depictis, & ad specimen doctrinæ & ad loci splendorem instrui quondam curarem, Tu Humanitatis eo tempore alumnus, ex illis eam adornandam suscepisti, quæ ita illic etiamnum perdurat, vt sine nominis tui recollectione conspici nequeat, & cuius lineamenta hîc quoque, cùm eam iterùm in effigie contuebere, facilè animo recurrent. FORTITVDO ea est, quasi dux quædam, imò medulla ceterarum atque firmamentum. Equitum illa virtus propria est; vt abs te sic quondam adumbrata, nouo huic decori velut augurio quodam iam tum prælusisse dicenda sit. Eam, vti & reliquas, non satis habui tum videre depictas coloribus, nisi postea quoque cernerem æri incisas. Quod quidem eo animo effeci vt latius spargerentur, vtque etiam papyro impressæ perennarent magis, cùm sua quoque chartis æternitas sit. Redit itaque

que ad Te Virtus illa tua; neque sola redit, sed
& reliquas secum deducit, cum vna omnium
societas sit. Ego verò id insuper effeci vt ne
incomptæ incomitataque redirent, sed aliquanto
ampliore verborum sententiarumque apparatu
instructæ. Quas ipsas (non tantum earum simu-
lacro) vti perpetuas D. T. Comites voueo ac
Magistras, ita munerum amplissimorum euen-
tus auguror longè secundissimos lætissimosque,
notitiâ vetere, nouo semper affectu

Tuus,

Generosissime Domine,

Jacobus Cæternus
SOC. IESV.

Antuerpiæ, Kal. Iunij,

M. DC. XLV.

FOR-

FORMA, COLOR, ORIGO
 CRVCIS S. IACOBI
 MORALITER EXPOSITA:
 AD EQVITEM FRANCISCVM.



*RVX gladio similis, gladij quoq₃ nomine dicta:
 Ille agere ingentes res docet, illa pati.
 Pro patriâq₃ Deoq₃ dare aut haurire cruorem
 En Crux sanguineo murice tincta monet.
 Nempe agere atque pati IACOBVM fortiter ensis
 Impulit: hinc gladio lausq₃ decusq₃ Cruci.
 Sanguine IACOBI, Maurorum sanguine mucro
 Cùm rubuit, dispar causa ruboris erat.
 Pro Cruce IACOBVS cecidit, caloq₃ superstes
 Pro Cruce barbaricos contudit ense Duces.
 Hinc gladiata novos sibi Crux delegit alumnos,
 Regius Heroas dum Cruce signat honos.
 Ut tibi defuerit IACOBI nomen, honorem
 Quondam & Francisco Crux dedit ipsa suum.
 Ergo Crucem gladiumq₃ pari moderamine iunge:
 FRANCISCVM aſt EQVITEM Crux gladiusq₃
 probant.*

E

QVADRIGA

VIRTVTVM CARDINALIVM

VITÆ HVIVS

VIATORIBVS EXHIBITA.



ITA Via est: currúne, an equis pedibúsvē terenda?
 Nec curru hac, nec equis, nec pede trita Via est.
 Imò & equis pedibusque & curru hac itur: eunti
 Nempe animo affectus pro pede ductor erit.

Et Virtus currumque & equos scit flectere. Fallor:

Pro curru vel equis certiùs ipsa vehet.

Non bigas ego iam trigasque híc ordine ducam:

Tempora dum pretium grandius ista petunt,
 Maiorisque iubar pompæ strepitumque: quadrigas

Non solus rutilo tramite Phæbus agit:

Terra auratarum quatitur splendore rotarum:

Tot sub quadrijugis terra fatiscit equis.

Quò properant? sæpè ad lautæ dispendia sortis:

Metæ, pauperies ultima sæpè loco est.

Quam Diuæ efficiunt quatuor præbentque, Quadriga

Vectorem ad summas commoda ducit opes.

Robur huic Dea dat Fortis; Moderata lupatos,

Temonem Prudens dirigit, Æqua rotas.

Hac tatum per mille vehit discrimina vitæ,

Altius exili plebe soloque leuat;

Eliamque suum super aurea sidera portat:

Nam rheda est, nullos quæ Phaëthontas habet.

A

PRV-

PRVDENTIÆ ICONISMVS.

HEVS, IUVENIS, QVO PROPERAS?
 SERPENTEM METVIS
 QVEM DIVA COMPLECTITVR?
 NON IS EST QVI TE MORDEAT,
 SED QVI VERAM DOCEAT

PRVDENTIAM;

QVAM SERPENTIS
 QVOQVE SYMBOLO
 IPSA OLIM EXPRESSIT
 VERBI INCREATI, INCARNATI
 SAPIENTIA.

SED ET SPECVLVM ASPICE,
 NON QVO CINCINNOS ORDINES,
 AVT FACIE TENVS TIBI BLANDIARE;
 SED QVO TEIPSVM
 PERVIDEAS PENITIVS,

ET



PRVDENTIAE SAC.
QVID VITES CVPIASVE, DICET ILLA
QVÆ RECTÆ RATIONIS EX AMVSSI,
AD FINEM, MEDIIS PROBLIS HONESTVM,
TENDENDV DOCET. HÆC SAPIT MAGISTRA



THE HISTORY OF THE
LIVES OF THE MOST
ILLUSTrious PRINCES OF
THE HOUSE OF BRUNSWICK
AND LUNEBURG
FROM THE YEAR 1686 TO 1740
BY JOHN HENRY WATSON
ESQ; OF THE MIDDLE TEMPLE
IN LAW
LONDON: Printed by J. DODD, in Pall-mall.
1741.

ET ANIMI SENSU ATQUE CONSILIA
CLARIUS PERSPICIAS,
PERFICIAS SECVRIVS.
ABI MODO QVO LVRET.
AD METAM TENDIS,
QVAM PROCVL DEMONSTRAS:
SAPIS, SI QVIDQVID AGAS
FINEM RESPICIAS;
MEDIA DISPICIAS, QVIBVS PERVENIAS.
SEQVERE RATIONEM,
NON IMPETVM;
ILLA RECTE:
SEQVERE CONSILIVM,
NON LIBIDINEM;
ILLO MATVRE OPERABERE.
ITA, LICET SIS IN VERE ANNORVM,
REPERIES TE IN AVTVMNO VIRTVTVM:
QVIA SIC, VEL IVVENIS
ABSQVE SENIO, SENEX ERIS.

SISTE HIC VEL IN LIMINE LECTOR: PAVCIS TE VOLO.



RV DENTIAE Iconismum paucis dedi; hoc est, iconem eius non effigie tantum, sed & oratione expressam. Exinde, paulò ampliorem eius descriptionem non verbis meis neg, etiam Sacrarum Litterarum Patrumq; testimoniis, sed ex ipsâ Gentilitate depromptis adiiciam; quo constet scilicet, quantum virtutes illæ (idem enim agam in ceteris) cum ipsâ naturâ sint coniunctæ, hominiqu; propriæ Ratione utenti. Et quidem cum hîc non agam Magistrum aut Doctorem, sed paucularum imaginum interpretem, non est mihi animus plurium Auctorum tabulas proferre, cum pro breuitate mihi propositâ, omnium instar mihi futurus sit M. T. Cicero; qui omnia hominis officia virtutum harum honestate definiuit. Igitur ea ex tribus Officiorum libris selegi, & catenatâ verborum illius sententiarumq; serie (etsi non ubiq; librorum illius ac locorum ordine) contexui quæ huc facere videbantur. Elegantius rem exprimere non potui, quàm ipsis verbis Oratorum maximi; aptius non potui, quàm sententiis eiusdem, Philosophorum non infimi: cum Orator sese etiam Philosophum cum hîc tum alibi non profiteatur tantum, sed ostendat.

DE VIRTVTIBVS CARDINALIBVS VNIVERSIM.

Ex Ciceronis libro 1. de Officiis.



Pruden-
tia.

Iustitia.

MNE quod honestum est id quatuor partium oritur ex aliquâ: aut enim in Perspicientiâ veri solertiâque versatur; aut in hominum Societate tuendâ,tribuendoque suum cuique & rerum contractarum fide; aut in animi excelsi atque inuicti
Ma-

Magnitudine ac robore ; aut in omnium quæ fiunt quæque dicuntur ordine & modo , in quo est Modestia & Temperantia. Quæ quatuor quamquam inter se colligata atque implicita sunt ; tamen ex singulis certa Officiorum genera nascuntur.

Fortitudo.
Temperantia.

P R V D E N T I A

Descripta ex libris Officiorum Ciceronis.



X quatuor locis, in quos honesti naturam vimque diuimus, primus ille qui in veri cognitione consistit, maximè naturam contingit humanam. [Lib. I.] Nam inter hominem & belluam hoc maximè interest, quod hæc tantum, quantum sensu mouetur, ad id solum quod adest quodque præsens est se accommodat , paululùm admodum sentiens præteritum aut futurum : homo autem , quoniam rationis est particeps, consequentia cernit, principia & causas rerum videt, earumque progressus & quasi antecessiones non ignorat, rebusque præsentibus adiungit atque annectit futuras: facilè totius vitæ cursum videt, ad eamque degendam præparat res necessarias. [Lib. I.] Vnde in primis hominis est propria veri inquisitio atque inuestigatio. Quòd enim verum simplex sincerumque est, id est naturæ hominis aptissimum. [Lib. I.] Et quidem princeps omnium virtutum est illa Sapientia quam Σοφία Græci vocant. Prudentiam enim, quam Φρόνησις dicunt, aliam quamdam intelligimus, quæ est rerum expetendarum fugiendarumque scientia: illa autem sapientia, quam principem dixi, rerum est diuinarum

atque humanarum scientia. [*Lib. 1.*] Quamquam illi ipsi doctrinæ studiis & sapientiæ dediti, ad hominum utilitatem suam sapientiam, prudentiam intelligentiamque potissimum conferunt. [*Lib. 1.*] Nam veri inuestigandi studio à rebus agendis abduci, contra officium est: virtutis enim laus omnis in actione consistit. Itaque omnis cogitatio motusque animi aut in consiliis capiendis de rebus honestis & pertinentibus ad benè beateque viuendum aut in studiis scientiæ cognitionisque versatur. [*Lib. 1.*] Cognitionem prudentiamque sequetur considerata actio: ita fit, ut consideratè agere, pluris sit quàm cogitare prudenter. [*Lib. 1.*] Ad rem gerendam autem qui accedit, caueat ne id modò consideret, quàm illa res honesta sit, sed ut etiam habeat efficiendi facultatem. In quo ipso considerandum est, ne aut temerè desperet propter ignauiam, aut nimis confidat propter cupiditatem. In omnibus autem negotiis priusquam aggrediare, adhibenda est præparatio diligens. [*Lib. 1.*] Ratione uti atque oratione prudenter, & agere quod agas consideratè, omnique in re quid sit veri videre & tueri decet; contraque falli, labi, errare, decipi, tam dedecet quàm delirare, & mente captum esse. Omnis autem actio vacare debet temeritate & negligentia; nec verò agere quidquam, cuius non possit causam probabilem reddere. [*Lib. 1.*] In primis autem constituendum est, quos nos & quales esse velimus, & in quo genere vitæ: quæ deliberatio est omnium difficillima. [*Lib. 1.*] Est igitur adolescentis, maiores natu vereri, ex hisque eligere optimos & probatissimos, quorum consilio atque auctoritate nitatur. Ineuntis enim ætatis inciticia senum constituenda & regenda prudentia est. Senibus autem labores corporis sunt minuendi; exercitationes

tationes animi etiam augendæ videntur. Danda verò opera, vt amicos & iuuentutem, & maximè Remp. consilio & prudentiâ quàm plurimùm adiuuent. Nihil est autem quod tam deceat, quàm in omni re gerendâ consilioque capiendo seruare constantiam. [*Lib.1.*]

Astutia tollendæ sunt, eaque malitia, quæ vult quidem videri se esse Prudentiam, sed abest ab ea distatque plurimùm. Prudentia est enim locata in delectu bonorum & malorum: malitia, si omnia quæ turpia sunt mala sunt, mala bonis anteponit. [*Lib.3.*] Quod qui parum prospiciunt, hi sæpè versutos homines & callidos admirantes, eorum malitiam sapientiam iudicant: quorum error eripiendus est, omnisque opinio ad eam speciem traducenda, vt honestis consiliis iustisque factis, non fraude & malitiâ se intelligant quæ velint consequi posse. [*Lib.2.*] Qui omnia metiuntur emolumentis & commodis, neque ea velint præponderari honestate, hi solent in deliberando honestum cum eo quod vtile putant comparare: viri boni non solent. [*Lib.3.*] Cum igitur aliqua species vtilitatis obiecta est, nos commoueri necesse est; sed si, cum animum attenderis, turpitudinem videas adiunctam ei rei quæ speciem vtilitatis attulerit, tunc vtilitas non requirenda est; sed intelligendum, vbi turpitudine sit, ibi vtilitatem esse non posse. [*Lib.3.*] In quo verbo lapsa consuetudo deflexit de via, sensumque eò deducta est, vt ab honesto vtile secerneret, & constitueret honestum aliquod quod vtile non esset; quâ nulla pernicies maior hominum vitæ potuit afferri. [*Lib.2.*] Aliud vtile interdum, aliud honestum videri solet falsò: nam eadem vtilitatis quæ honestatis est regula.

Qui

Qui hoc non præuiderit, ab hoc nulla fraus aberit, nullum facinus. Peruertunt autem homines ea quæ sunt fundamenta naturæ, cum vtilitatem ab honestate seiungunt. Est enim nihil vtile quod idem non honestum; nec quia vtile honestum est, sed quia honestum, vtile. [Lib.3.] Maneat ergo, quod turpe sit, id nunquam esse vtile; nec tum quidem, cum quod vtile putes, adipiscare. Hoc enim ipsum, vtile putare, quod turpe sit, calamitosum est. [Lib.3.]

A Vrem hîc mihi vellicat Cicero, admonetq; disputatione hac suâ ultimâ de vtilitate fucatâ, quæ cum honestate coniuncta non sit, de calliditate aliisq; quæ speciem quamdam Prudentiæ præ se ferant, absint tamen ab eâ quam longissimè; admonet, inquam, ut post veræ Prudentiæ delineationem, falsæ Prudentiæ (si falsa umquam dici potest, quæ Prudentia est, quæ Virtus est) ideam quamdam exhibeam. Paucis itaque & Prudentiæ & ceterarum exinde Virtutum quosdam quasi abortus adiiciam. Sed date veniam verbo. Non abortiunt veræ virtutes, viuarum actionum integræ matres atque sæcundæ; & si simulacra quadam virtutum ac monstra sunt, fetus illi virtutum non sunt. Laruas itaque virtutum nuncupabo, ut ex falsis veræ, ex fictis sinceræ, ex umbris virtutum virtutes ipsæ clariores appareant. Ceterum quia fictæ ac malæ, epigrammate sunt perstringendæ.



LARVA PRVDENTIAE; PSEVDOPOLITICA.



Ciues, ciues, quærenda pecunia primùm est: Horat.
Virtus post nummos: sic sape quisquis amat Epist. 1.
Et proprium decus, & natorum, atque aurea vitæ
Tempora. Sic fora sic Ianus uterque docent. Horat. ib.

Dissimula tamen, atque nihil nisi publica clama

Commoda priuatis anteferenda bonis.

Verba fidem resonent, nil non violabile celent

Pectora, promissis nec moueare datis.

Aura atque Ara pari vertantur flamine: nam quò

Sorsque statusque iubent, flectere vela decet.

Sincera mentis sic fucus adulterat aurum,

Sic praeunt veris falsa profana Sacris.

Doctior at Sapiens: Hæc est prudentia carnis:

Cum nulla est animi aut ultima cura tui.

Cum potius probitate lucrum est, falsum utile honesto;

Qualescumque, bonæ cum reputantur opes.

Corporis hoc totum est, animo nil denique restat.

At pretium pars hæc corpore maius habet.

Scilicet hæc vita est, sine vitâ animoque? sagaci

Prospicere hoc vitæ est calliditate suæ?

Credite iurato: Carnis prudentia mors est.

Quis valeat vitam morte fouere suam?

Ad Rom.
cap. 8.

Ouid. l. 1.
de Re-
med.

Ad Rom.
cap. 8.

IVSTITIÆ ICONISMVS.

CREDIS IVSTITIAM VIDERE
 QVI MVNERA OBTRVDIS?
 AVDIRE, QVI MINAS INGERIS?
 CÆCA ET SVRDA EST
 VERA IVSTITIA;
 AT NON EA CÆCITATE
 QVAM OBIECTVM
 OCVLIS AVRVM;
 NON EA SVRDITATE
 QVAM LAVTA PROMISSA
 EFFICERE SOLENT.
 NIMIUM VIDET,
 SI AVRVM VIDET:
 NIMIUM AUDIT,
 SI BLANDITIAS PERCIPIT.
 ET VIDET TAMEN, ET CÆCA EST;
 ET AUDIT TAMEN, ET SVRDA EST.

V I D E T
 VT INVESTIGET CRIMINA
 QVÆ PLECTAT;



IVSTITIÆ SAC.
SI NEC TONANTI, NYMPHA, POTENTIÆ,
NEC BLANDIENTI CESSERIS, ET MINIS
INVICTA, ET INCORRUPTA DONIS;
VIRGO EQVIDEM POTERIS VOCARI.

VT EXPLORET MERITA
 QVÆ PRÆMIO AFFICIAT:
 CÆCA TAMEN EST,
 NE IN HIS PERSONAM RESPICIAT.

A V D I T

ACCVSATOREM ET REVM:
 N O N A V D I T
 ADVLATOREM ET MINACEM,
 QVO MINVS LIBERE
 VNICVIQ. IVS SVVM TRIBVAT.
 TANTA IPSI A GLADIO FIDVCIA
 ET ÆQVITAS A BILANCE:
 NEC A SPE ILLECEBRA;
 NEC A METV TREPIDATIO.
 INTER VTRVMQVE SEDET
 INCONCVSSA;
 SICVT INTER SIDERA,
 SIC ET IN TERRIS

V I R G O,
 QVAMDIU SIC INCORRVPTA.

I V S T I T I A

Descripta ex libris Officiorum Ciceronis.



IUSTITIA, in quâ virtutis splendor est maximus, ex quâ boni viri nominamur [Lib. 1.] virtus est omnium Domina & Regina Virtutum. [Lib. 3.] Nihil enim honestum esse potest quod Iustitiâ vacet; & nullum est tempus quod Iustitiâ vacare debeat. [Lib. 1.] Hæc in hominum societate tuenda tribuendoque suum cuique & rerum contractarum fide versatur. Fundamentum enim Iustitiæ est fides, id est dictorum conuentorumque constantia & veritas: ex quo quamquam hoc videbitur fortasse cuiuspiam durius, tamen audeamus imitari Stoicos, qui studiosè exquirunt vnde verba sint ducta, credamusque quia *fiat* quod dictum est, appellandam *fidem*. [Lib. 1.] Quamquam autem omnis Virtus nos ad se allicit, facitque vt cos diligamus in quibus ipsa inesse videatur, tamen Iustitia & Liberalitas id maximè efficit. [Lib. 1.] Fundamentum enim perpetuæ commendationis & famæ est Iustitia, sine quâ nihil potest esse laudabile. [Lib. 2.] Ea enim, ex quâ viri boni appellantur, mirifica quædam res multitudini videtur: nec iniuriâ: nemo enim iustus esse potest qui mortem, qui dolorem, qui exilium, qui egestatem timet, aut qui ea quæ his sunt contraria æquitati anteponit; maximeque admirantur eum qui pecuniâ non mouetur, quod in quo viro perspectum sit, hunc dignum spectatu arbitrantur. Itaque illa quæ proposita sunt ad gloriam, omnia Iustitia conficit, & beneuolentiam, quòd prodesse vult plurimis, & ob eandem causam fidem & admirationem, quòd

quòd eas res spernit & negligit ad quas plerique inflamma-
 ti auiditate rapiuntur. [*Lib.2.*] Hinc nullâ re conciliare fa-
 ciliùs beneuolentiam multitudinis possunt ij qui Reipub.
 præsunt, quàm abstinentiâ & continentiâ. [*Lib.2.*] Est igi-
 tur proprium munus Magistratus, intelligere se gerere per-
 sonam Ciuitatis, debereque eius dignitatem & decus susti-
 nere, seruare leges, iura describere, ea fidei suæ commissa
 meminisse. [*Lib.1.*] Ita probanda est mansuetudo atque
 clementia, vt adhibeatur Reip. causâ seueritas, sine quâ ad-
 ministrari ciuitas non potest. Omnis autem & animaduer-
 sio & castigatio contumeliâ vacare debet, neque ad eius qui
 punit aliquem aut verbis castigat, sed ad Reip. vtilitatem
 referri. Prohibenda autem maximè est ira in puniendo:
 numquam enim iratus qui accedet ad pœnam mediocrita-
 tem illam tenebit, quæ est inter nimium & parum. Optan-
 dum itaque vt ij qui præsunt Reip. legum similes sint,
 quæ ad puniendum non iracundiâ sed æquitate ducuntur.
 [*Lib.1.*] His etiam qui vendunt, emunt, conducunt, locant,
 contrahendisque negotiis implicantur, Iustitia ad rem ge-
 rendam necessaria est: cuius tanta vis est, vt ne illi quidem
 qui maleficio & scelere pascuntur possint sine vllâ particu-
 lâ Iustitiæ viuere; nam qui eorum cuipiam, qui vnâ latro-
 cinantur, furatur aliquid aut clàm eripit, is sibi ne in latro-
 cinio quidem relinquit locum. [*Lib.2.*]

In iustitiæ duo genera sunt; vnum eorum qui inferunt,
 alterum eorum qui ab iis quibus infertur, si possint, non
 propulsant iniuriam. Maximam autem partem ad iniuriam
 faciendam aggrediuntur nonnulli, vt adipiscantur ea quæ
 concupierunt: in quo vitio latissimè patet auaritia. [*Lib.1.*]

Delectant magnifici apparatus vitæque cultus cum elegantia & copiâ, quibus rebus effectum est ut infinita pecuniæ cupiditas esset. Maximè autem adducuntur plerique ut eos Iustitiæ capiat obliuio, cum in imperiorum, honorum, gloriæ cupiditatem inciderint. [*Lib. i.*] Difficile autem est, cum præstare omnibus concupieris, seruare æquitatem, quæ est Iustitiæ maximè propria. Ex quo fit ut neque disceptatione vinci se, nec vlllo publico ac legitimo iure patiantur; existuntque in Remp. plerumque largitores & factiosi, ut opes quàm maximas consequantur, & sint vi potius superiores quàm Iustitiâ pares. [*Lib. i.*] Cum autem duobus modis, id est, aut vi aut fraude fiat iniuria; fraus quasi vulpeculæ, vis leonis videtur: vtrumque ab homine alienissimum, sed fraus odio digna maiore. Totius autem iniustitiæ nulla capitalior est quàm eorum, qui tum cum maximè fallunt, id tamen agunt, ut viri boni esse videantur. [*Lib. i.*]

Meminerimus autem etiam aduersus infimos Iustitiam esse seruandam: est autem infima conditio & fortuna seruatorum. [*Lib. i.*] Cauendum est etiam ne maior poena quàm culpa sit, & ne iisdem de causis alij plectantur, alij ne appellentur quidem.



LARVA IUSTITIÆ, MINORVM PVNITIO, MAIORVM IMPVNITAS.



AT veniam coruis, vexat censura columbas,

Territa si ditum sorte statera labat.

Perrumpunt bruchi que & vespe retia, arachne

Quæ de visceribus neuerat ipsa suis.

Iuven.

Sat. 2.

Heu! tenues muscæ laqueis fatalibus hærent,

Si dispar legum est Iustitiæque tenor:

Si taceant ad magnorum subsellia noxas;

Si peccante inflet paupere præco tubam,

Discite iustitiam moniti; pars quantula veræ

Iustitiæ hæc dici (vel magis Umbra) queat?

Si cupias iustum geminâ suspendere lance,

Æquali cunctos pondere libra probet:

Sin contrâ; sedet hac Dominus, cui multa supellex,

Multaque, præter opes, gratia, multus honos.

Lancem tot grauium rerum momenta, virumque

Demittent, terræ restituentque suæ.

Parte aliâ famulus cui nec fauor aulicus, aut res

Aurea, de furcâ pensile fiet onus.

Pauperem opum dum nulla iuuant heu! pondera rerum,

Sic leuitas vacuæ lancis ad astra vehet.

Æneid. 6.

Perf.

Sat. 4.

FOR.

FORTITVDINIS ICONISMVS.

QVISQVIS EFFIGIEM SPECTAS

FORTITVDINIS,

VIM EIVS PERCIPE ET IMITARE:

ARMATA EST

NON MAGIS FERRO

QVAM GENIO SVO:

ROBUSTA

NON TAM CORPORE QVAM ANIMO:

ISTVD ENIM GLADIATORVM EST,

HOC HEROVM.

MANV ALTERA SCEPTRVN GERIT,

ET IN SCEPTRO MANVM:

QVOD NON TANTVM AGENTIS EST,

ET PRÆCLARA INCHOANTIS,

SED AD EXITVM PERVRGENTIS.

ALTERA MANV COMPLEXA CRVCEM,

NON MINVS IN PATIENDO

QVAM AGENDO INDOLEM PROBAT.

IN ARDVO POSITA,

EXCELSOS ANIMOS,

MAR-



AGERE.

PATI.

FORTITVDINI SAC.
QVID SCÆVAS, DECIOSQVE, REGVLOSQVE
ROMANOS ANIMOS, CANIT VETVSTAS.
VEROS CHRISTIADVM STVPE TRIVMPHOS:
SIC AGIT PATITVRQVE FORTITVDO.

MARMORI INNIXA, CONSTANTES
IN PERAGENDO DEPOSCIT.

HABES HINC IN IMAGINE ET ILLINC
QVOS SEQVARE.

FORTEM TE DIXERO
SI ILLVM FVERIS ÆMVLATVS
ET ISTVM.

AGIT ILLE GENEROSE
ET DRACONEM CONFICIT.
PATITVR ISTE SAGITTAS
ET RIDET.

TV QVOT VITIA TOT DRACONES
PERSEQVERE,
VIRTVTEM PROSEQVERE.
TV PRO SAGITTIS ETIAM INIVRIAS;
QVIN ET ADVERSA OMNIA
INTREPIDVS EXCIPE.

SIC AGERE ET PATI FORTIA
PLVSQVAM ROMANVM EST,
QVIA CHRISTIANVM EST.

F O R T I T V D O

Descripta ex libris Officiorum Ciceronis.



ORTITVDO in animi excelsi atque inuicti magnitudine ac robore versatur. [Lib. i.] Vera autem & sapiens animi magnitudo, honestum illud, quod maximè naturam sequitur, in factis positum non in gloriâ iudicat, principemq; se esse mauult quàm videri. Etenim qui ex errore imperitæ multitudinis pendet, hic in magnis viris non est habendus. [Lib. i.] Interim intelligendum est, cum proposita sint genera quatuor, è quibus honestas officiumque manaret, splendidissimum videri, quod animo magno elatoque, humanasque res despiciente, factum sit. Et in laudibus, quæ magno animo fortiter excellenterque facta sunt, nescio quomodo pleniore ore laudamus. [Lib. i.] Iam, illud honestum, quod ex animo excelso magnificoque quærimus, animi efficitur, non corporis viribus. Exercendum tamen corpus & ita afficiendum est, ut obedire consilio rationique possit in exequendis negotiis & in labore tolerando. [Lib. i.] Omnino fortis animus & magnus duabus rebus maximè cernitur; quarum vna in rerum externarum despicientiâ ponitur: cum persuasum sit, nihil hominem nisi quod honestum decorumque sit, aut admirari aut optare, aut expetere oportere, nullique neque homini neque perturbationi animi nec fortunæ succumbere. Altera res est, ut cum ita sis animo affectus, ut supra dixi, res geras magnas illas quidem & maximè utiles, sed vehementer arduas plenasque laborum & periculorum cum vitæ

vitæ tum multarum aliarum rerum quæ ad vitam pertinent. Harum rerum duarum splendor omnis & amplitudo est, addo etiam vtilitatem, in posteriore: causa autem & ratio efficiens magnos viros est in priore. In eo enim est illud, quod excellentes animos & humana contemnentes facit. Id autem ipsum cernitur in duobus: si & solum id quod honestum sit bonum iudices; & ab omni animi perturbatione liber sis. Nam & ea quæ eximia plerisque & præclara videntur parua ducere, eaque ratione stabili firmâq; contemnere, fortis animi magniq; ducendum sit. Et ea quæ videntur acerba, quæ multa & varia in hominum vitâ fortunâq; versantur, ita ferre ut nihil à statu naturæ discedas, nihil à dignitate sapientis, hoc robusti animi est, magnæque Constantiæ. Non est autem consentaneum, qui metu non frangatur, eum frangi cupiditate; nec qui inuictum se à labore præstiterit, vinci à voluptate. Quamobrem & hæc vitanda sunt, & pecuniæ fugienda cupiditas. Nihil enim est tam angusti animi tamque parui quàm amare diuitias. Nihil honestius magnificentiusque quàm pecuniam contemnere, si non habeas; si habeas, ad beneficentiam liberalitatemque conferre. Cauenda est etiam gloriæ cupiditas; eripit enim libertatem, pro quâ magnanimis viris omnis debet esse contentio. Nec verò imperia expetenda, ac potius aut non accipienda interdum, aut deponenda nonnumquam. Vacandum autem est omni animi perturbatione, tum cupiditate & metu, tum etiam ægritudine & voluptate animi & iracundiâ, ut tranquillitas adsit & securitas quæ afferat tum constantiam, tum etiam dignitatem. [*Lib. 1.*] Sunt verò qui in rebus contrariis parum sibi consent, voluptatemq; seuerissimè contemnant, in dolore sint molliores; gloriam negligant,

ligant, frangantur infamiâ: atque ea quidem non satis constanter. [*Lib. 1.*] Fortis verò & constantis est non perturbari in rebus asperis, nec tumultuantem de gradu defici, ut dicitur; sed præsentis animi uti consilio, nec à ratione discedere. Quamquam hoc animi, illud etiam ingenij magni est, præcipere cogitatione futura, & aliquanto antè constituere quid accidere possit in vtramque partem, & quid agendum sit cum quid euenerit; nec committere aliquid, ut aliquando dicendum sit, *Non putaram*. Hæc sunt opera magni animi & excelsi, & Prudentiâ consilioque fidentis. [*Lib. 1.*] In rebus autem prosperis, & ad voluntatem nostram fluentibus, superbiam magnoperè, fastidium arrogantiamque fugiamus. Nam ut aduersas res sic secundas immoderatè ferre, leuitatis est: præclaraque est æquabilitas, in omni vitâ & idem semper vultus eademque frons. [*Lib. 1.*] Denique multò magis est secundùm naturam celsitas animi & magnitudo, itemque comitas, Iustitia, liberalitas, quàm voluptas, quàm vita, quàm diuitiæ; quæ quidem contemnere & pro nihilo ducere, comparantem cum vtilitate communi magni animi & excelsi est. [*Lib. 3.*] Porro omnium omnino charitates patria vna complexa est, pro quâ quis bonus dubitet mortem oppetere, si ei est profuturus. [*Lib. 1.*]

EA animi elatio quæ cernitur in periculis, in laboribus, si Iustitiâ vacet, pugnatque non pro salute communi, sed pro suis commodis; in vitio est. Non modò enim id Virtutis non est, sed potiùs immanitatis, omnem humanitatem repellentis. Itaque probè definitur à Stoicis Fortitudo, cum eam Virtutem esse dicunt pugnantem pro Æquitate. Quocircà nemo qui Fortitudinis gloriam consecutus est, insidiis

insidiis & malitiâ laudem est adeptus. [*Lib.1.*] Et quidem animus paratus ad periculum si suâ cupiditate, non vtilitate communi impellitur, audaciæ potiùs nomen habeat quàm Fortitudinis.

LARVA FORTITVDINIS DVELLV M.



ORTIOR est qui se quàm qui fortissima vincit

Varij.

Mœnia. *Quale etenim mœnia robur habent?*

Mortua res terra & lignum est, res mortua saxum;

Hanc fossor, faber hoc, hoc lapicida domant.

Vince animos iramque tuam qui cetera vincis:

Ovidius
Epist.
Bris.

Illa viri titulum gloria Fortis habet.

Scilicet est verbo qui pungitur: ignis & ensis

Vindicta in rabiem corque manumque trahunt.

Exclamat, sociumque rapit per fata secundum;

Et gratis vitam commodat iste suam.

Alter & ad dictam cum compare tendit arenam:

Hic genium furiae Mars superet ipse nouæ.

Unius è multis minimùm stat sanguine palmas;

Sapè etiam numero procubuere pari.

Scilicet hos Fortes qui dixeris, unicum honoris

Fortius is punctum, quo cecidere, facit.

Sed neque virtutis titulum tam futile punctum;

Nec tantum insani promeruere decus.

Heroës se digna ineunt certamina. Puncto

Arctari Virtus tam generosa nequit.

TEMPERANTIÆ ICONISMVS.

CERNIS HVNC GENIVM
 QVISQVIS TABELLAM HANC CERNIS?
 MODERATE VINVM DVM INFVNDIT
 ATQVE ETIAM AQVAM AFFVNDIT,
 IPSAM EXHIBET

TEMPERANTIAM.

NEQVE TAMEN CIBI SOLIVS
 AVT POTIONIS MEDIOCRITATE
 DIVAM HANC CIRCVMSCRIPSERIS.
 TOT SVBDITORVM MODERATRIX EST
 QVOT MOTVVM,
 QVOT APPETITIONVM
 ANIMVS PARENS EST.
 ASPICIS ILLAM IN QVADRIGA
 TRIVMPHANTEM?
 ASPICIS HOS PVSIONES IN BELLVIS
 VELVT EQVIS SINGVLARIBVS
 DOMINÆ LATVS STIPANTES?

ET



TEMPERANTIÆ SAC.
 VT VENVS, ET VENERIS NATVS, BACCHVSQ. CERESQ.
 VT RABIDÆ SVBEVNT STRICTA CAPISTRA FERÆ.
 TEMPERAT HÆC CVPIDOS MOTVS, ET TVRBIDA FRENAT
 PECTORA. FLEXANIMAM DIXERIS? IMO DEAM



THE UNIVERSITY OF CHICAGO
LIBRARY
1100 EAST 58TH STREET
CHICAGO, ILL. 60637
TEL. 733-4331
1968

ET HÆC SVAVITER
ET ILLI IVCVNDE FERVNTVR.
IVNXIT ILLA CVRRVI SVO
A QVIBVS TVRBÆ OMNES
OMNISQVE REBELLIO:
NEQVE TAMEN INDOMITE RAPITVR,
SED VEHITVR PLACIDE,
QVIA TAM VALIDVM
IN FRÆNO FERVLAQVE
IMPERIVM, ET AB IMPERIO
TAM QUIETA SECVRITAS EST.
SED CAVE SINAS INVALESCERE
QVOD STATIM PRIMO IN IMPETV
FRACTVM OPORTVIT.
FERAS ETIAM GRANDES
ET VALIDAS
VEL PVERI REXERINT,
SI PARVAS PRIVS AC TENERAS
MAGISTRA MANVS
PARERE DOCVERIT.
TEM.

TEMPERANTIA

Descripta ex libris Officiorum Ciceronis.



EQVITVR vt de illâ reliquâ parte honestatis dicendum sit, in quâ verecundia & quidem quasi ornatus vitæ, Temperantia & modestia omnisque sedatio perturbationum animi & rerum *modus* cernitur. [Lib. I.] Ordo enim & constantia & moderatio & ea quæ sunt his similia versantur in eo genere ad quod adhibenda est quædam actio, non solum mentis agitatio. His enim rebus quæ tractantur in vitâ modum quemdam adhibentes & ordinem, honestatem & decus conservabimus. [Lib. I.] Nec verò illa parva vis naturæ est rationisque, quod vnum hoc animal (homo) sentit quid sit ordo, quid deceat, in factis dictisque qui sit *modus*. Itaque eorum ipsorum quæ aspectu sentiuntur, nullum aliud animal pulchritudinem, venustatem, convenientiam partium sentit. Quam similitudinem natura ratioque ab oculis ad animum transferens, multò etiam magis pulchritudinem, constantiam, ordinem in consiliis factisque conservandum putat, cauetque ne quid indecorè effeminatève faciat: tum in omnibus & opinionibus & factis ne quid libidinosè aut faciat aut cogitet. [Lib. I.] Curandum enim est vt cogitatione ad res quàm optimas utamur, appetitum rationi obedientem præbeamus. [Lib. I.] Nam voluptates blandissimæ dominæ sæpè maiores partes animi à virtute detorquent. [Lib. 2.] Est verò Temperantia libidinum inimica; libidi-

nes

nes autem confectatrices voluptatis. [Lib.3.] Nobis autem cum à naturâ constantiâ, moderationis, temperantiâ, verecundiâ partes datæ sint, cumque eadem natura doceat, quemadmodum nos aduersus homines geramus; efficitur ut & illud quod ad omnem honestatem pertinet decorum, quàm latè fufum fit appareat, & hoc quod spectatur in vnoquoque genere virtutis. [Lib.1.] Est igitur duplex vis animorum atque naturæ. Vna pars in appetitu posita est, quæ est ὁρμή Græcè, quæ hominem huc & illuc rapit; altera in ratione, quæ docet & explanat quid faciendum fugiendumque sit. Efficiendum autem est ut appetitus rationi obediant, eamque neque præcurrant, aut propter pigritiam & ignauiam deserant; sintque tranquilli atque omni perturbatione animi careant, ex quo elucebit omnis constantia omnisque moderatio. Nam qui appetitus longius euagantur, & tamquam exultantes siue cupiendo siue fugiendo non satis ratione retinentur, hi sine dubio finem & modum transeunt. Relinquunt enim & abiiciunt obedientiam, nec rationi parent, cui sint subiecti lege naturæ: à quibus non modò animi perturbantur, sed etiam corpora. [Lib.1.] Si quis est paulò erectior, quamuis voluptate capiatur, occultat & dissimulat appetitum voluptatis propter verecundiam: ex quo intelligitur, corporis voluptatem non satis esse dignam hominis præstantiâ, eamque contemni ac reici oportere. [Lib.1.] Itaque victus cultusque corporis ad valetudinem referantur & ad vires, non ad voluptatem. Atque etiam si considerare volumus quæ sit in naturâ excellentia & dignitas, intelligemus quàm sit turpe diffluere luxuriâ, & delicatè ac molliter viuere; quamque honestum, parcè, continenter, seuerè sobrieque. [Lib.1.] Maximè au-

tem prima ætas à libidinibus arcenda est, exercendaque in labore patientiâque & animi & corporis, vt eorum & in bellicis & in civilibus officiis vigeat industria. [*Lib. 1.*] Luxuria verò cùm omni ætati turpis, tum senectuti fœdissima est. Sin autem & libidinum intemperantia accesserit, duplex malum est, quod & ipsa senectus concipit dedecus, & facit adolescentium impudentiorem intemperantiam. [*Lib. 1.*]

Nullum vitium tetrius est quàm auaritia. [*Lib. 2.*] Res autem familiaris quæri debet iis rebus à quibus abest turpitudine, conseruari autem diligentia & parsimonia, iisdemque etiam rebus augeri. [*Lib. 2.*]



LARVA TEMPERANTIÆ, A V A R I T I A

TEMPERANTIÆ SIMVLATRIX.



EC dubiè tamquam frugi laudatur auarus ;
Tamquã parcus homo, *qui malè diues homo est.*
Fallit enim vitium specie virtutis & vimbrâ:
Virtuti asperitas nam vitioque sua est.

Iuuenal.
Sat. 14.

Ibidem.

Sed ne fide oculis : animo censore profundum

Discute : quamquam oculis hæc quoque larua patet.

Euclio, defossis cui res suspirat in ollis,

Cuius opes centum strangulat arca seris,

Centone en miseros obolari inuoluitur artus:

Si tamen hoc etiam sat caro tecta modo est.

Hæccine laudata est moderata modestia vitæ?

Sordibus at cultus proditur iste suis.

Mucida quæ rodit bis cocti tempore panis

Anne aliquid veræ frustula frugis habent?

Hoc Virtutis opus, iustâ ratione modoque

Vti, ac possessis abstinuissè bonis.

Cur sibi nil aliisque minus concedit auarus ?

Pauper auarus homo est, non habet hoc quod habet.

APPENDICVL A.

Cum virtus media sit inter extrema vitia, visum fuit non avaritiam tantum adiungere Temperantiam, sed & prodigalitatem subiungere. Igitur post avaritiam ecce tibi nomen MODI, Temperantiam proprium, ad prodigalitatem, luxum, intemperantiam morémque temporis huius cum ludibrio deflexum usurpatumque.

Horat.
lib. 1.
Sat. 1.



Est *modus* in rebus, sunt certi denique fines,
Quos ultra ratio tendere honesta vetat.
Est *modus* in rebus, vitæ mensura modestæ
Est *modus*: at morum iam *modus* absq; modo est.
Peruersusque modi modò nomine desipit usus;
Quidquid stultitiæ luditur, hoc *modus* est.
Luxuriant mensæ? *modus* est. Potatur & estur
Ære graui? *modus* est: & *modus* est in equis,
In rhedisque *modus*, *modus* in choreis que iocisque
Fingitur; estque modi quæ via nomen habet.
Vestibus & quotuplex *modus* est? noua cuditur omni
Forma die: hic *modus* est; materiemque *modus*,
Materiesque modum noua fabricat. Ille puellas,
Ille rotat iuuenes more volante *modus*.
Crinibus ecce *modus* nouus est & corpore toto,
Pileolisque nouus palliolisque *modus*.
Vertigo capiti sæpè est lunatica; sed iam
Lunatos etiam cernimus ire pedes.

Calceus

Calceus inflexæ prætentat cornua frontis,
 Sesquipede excedens longior ipse pedem.
 An fors *patriciâ claudens vestigia lunâ,*
 Ut quondam, illustres iam modus iste probat?
 Omnia cùm toties noua sint, modus omnia versat;
 Et quoties ventus, vertitur ipse modus.
 Vnde intemperies tam publica, totque nouarum
 Tot rerum facies? *mosque modusque* iubent.
 Quis modus hic vitæ est sic insanire, modumque
 Ad patrocini flexere iura sui?
 Parcite ohe! figuli tot morum totque modorum:
 Vnus honestati *mosque modusque* fat est.

Statius
 l. 5. Sylu



APPROBATIO.

VIRTUTES *Cardinales Ethico Emblemate expref-
fa & utiliter typis exprimentur.*

P. Coens S. Th. L. Canonicus,
& Lib. Cenfor Antuerp.

